

Sflacjons e insolenz

Un sfuei che al vares di jessi l'incarnazion de plui pure ortodossie, "Collegamento dei Comitati Civici" (n.3) al impieghe une buine colone e mieze a dî dut il mâl pussibil dai talians. Al scomenze cui dî: "Uê che duc' i talians a' fasin pulitiche - o ch'a pratindin di fâle - al è plui clâr che mai che tra i talians e la pulitiche al è di miez un "fat personal" ch'al ven a stai une vere impossibilitât di stâ insieme. Salacôr parcè che il talian si è cjatât a jessi, in dut il timp de sô curte storie nazionâl, simpri in tun berdei di balfuèriis e di crisis, la sô educazion pulitiche no je stade pussibil: ma aromai si pò ancje scrupulâ che il talian nol rivi mai plui adore di "educasi" pardabon.

Tal temperament dai talians 'e je une cjarie tremende di passion, di calôr, di fazilitât a entusiasmasi e a butâsi jù, e par conseguenze nol è bon di controlâsi di bessôl e al è simpri pront a butâsi tal fanatisim plui uarp, plui intolerant e plui dogmatic". Culî si fevele, naturalmentri, dai talians che vadin daûr dai partîz. Ma il sfuei dai Comitât Civics al ripuarte ancje la tremende difinizion dal talian, scrite da Schopenhauer, che finîs cun chestis peraulis: "Cui ch'al à un fregul di pudôr, in ciertis cjosis al è sudizionôs e in ciertis al è magari supiarbeôs: il talian nol è mai ne chel ne chel, ma secontri i momenz al è o un poltron o un insolent".

Al pò stai che Schopenhauer al sedi lât un fregul masse in lâ (il sfuei dai Comitât al dîs di no) parvie ch'al jere un todesc: ma - che sedi cemût che si ûl - 'o varessin gust di savê se i nestris letôrs furlans si tegnaressin in bon di jessi judicâz in chesc' tiarmins.

Se l'amôr pe nestre int no nus à svuarbâz, nus parares che al sei une vore difizil clamâ poltrons i Furlans, che par dut il mont a son inomenâts come lavoradôrs risistenz e ustinâz ancje plui dai Todescs; i Furlans se no cjàtin lavôr a cjase lôr a' vadin a cirilu dapît dal mont, armâz di marcjel, di cjazze, di sièe, di plane, di pale e picon... E par cont de insolenze, se cualchidun dai Furlans al à imparât chel vizi, lu à imparât tal sen dai partîz, par merit dai partîz e dal esempi dai caporions di partît: di chêi di uê e di chêi di îr.

Se i conotâz dai Talians a' son "poltronarie e insolenze", noaltris sin Furlans...

Patrie dal Friûl, n. 8 16/30 di Avrîl 1950